

# TEZAU LITURGIC

20 MAI

# ACATISTUL SF. CNEAZ DOVMONT- TIMOTEI DE LA PSKOV



MOSCOVA, 2000



**Акафист**  
**благочервному князю**  
**Довмонту-Тимофею**  
**Псковскому**

**Кондак 1**

Взбранный воеводо и дивный наш покровителю, святой благоверный княже Довмонте, благодарственное пение приносим, светло почитаючи святую память твою, яко усердному почитателю Святыя Троицы, яко крепкому защитителю от враг видимых и невидимых, яко любящему нас отцу нашему. Ты же яко имеяй дерзновение ко Святей Троице молися о спасении нас тебе зовущих:

Радуйся, дивный наш покровителю, святой благоверный княже Довмонте.

**Икос 1**

Ангела своего хранителя от врагов видимых дарова Господь ты граду Пскову во дни жития твоего святого, святой благоверный княже Довмонте. Тем же ангелом хранителем явился еси и по смерти своей, охраняя всех чтущих тя

от врагов видимых и невидимых, от навета злых человек восстающих на нас. Сего ради приими от нас благодарственную песнь сию:

Радуйся небесный наш покровителю.

Радуйся, известный всех ищущих от тебе помощи и заступления крепкий защитителю.

Радуйся, града Пскова воеводо дивный.

Радуйся, храма Святыя Троицы сокровище многоценное.

Радуйся к сонму покровителей Отечества нашего сопричтенный.

Радуйся, защитниче наш и поныне преизрядный.

Радуйся, яко со всеми угодниками Божиими о нас недостойных молишися.

Радуйся, яко благая и полезная нам пред Господем ходатайствуеши.

Радуйся, дивный наш покровителю, святыи благоверный княже Довмонте.

## **Кондак 2**

Видяще тя людие града Пскова, святыи благоверный княже Довмонте, от своих

изгнаннаго и ими преследуемаго, во святыи град их в сей напасти пришедшаго, прияша тя с любовью и не токмо жити устроиша, но и княжити над ними поставиша тя. Ты же блаженне, сие доброе дело радостно, яко дар от них приял еси, и до кончины жития своего не забыл еси, сторицею благостию за благость им воздавая, да поют вкупе с тобою Господу Богу благодарственную песнь: Аллилуиа.

## Икос 2

Разум богопросвещенный дарова тебе Господь Бог, святыи благоверный княже Довмонте, егда ты во град Псков жити пришел еси: язычник сый христианином добрым по приятии святаго крещения содеялся еси, любовью отеческою любя русския люди, сохраняя и соблюдая их в мире, да зовут тебе:

Радуйся, разумом богопросвещенным от Господа обогащенный.

Радуйся, храбростию и мужеством от Него наделенный.

Радуйся, мрак языческий без колебания оставивый.

Радуйся, свет веры христианския радостно восприявый.

Радуйся, во всем житии своем веру православную свято соблюдавый.

Радуйся, обеты крещения ничем же нарушивый.

Радуйся, яко родитель любомудрый Псковским людям бывый.

Радуйся, яко орел бодренный, аки от воронов хищных, от врагов их спасаый.

Радуйся, дивный наш покровителю, святой благоверный княже Довмонте.

### **Кондак 3**

Силою свыше озаренный, святой благоверный княже Довмонте, по святом крещении новым человеком стал еси; благодать святого крещения добрыми делами укрепляя и Господа Бога, яко родителя добраго, неленостно почитая, поя Ему во умилении: Алилуиа.

### **Икос 3**

Имуще людие града Пскова на совести своей слово, взятое от них святым благоверным князем Александром Невским, яко приимати в горе и от пленения пришедших, пришедшаго ты, святой княже Довмонте, прияша и

княжити над собою поставиша. Мы же, видевше сие, приветствуем тя званьями сими:

Радуйся, град Псков, яко второе отечество себе стяжавый.

Радуйся, любовью с народом русским себе связавый.

Радуйся, мужества носитель неподражаемый.

Радуйся, добродетелей делатель неленностный.

Радуйся, мужеством своим, яко стеною Псковскую землю оградивый.

Радуйся, страх и трепет храбростию своею во врагах вселивый.

Радуйся, радование наше и упование.

Радуйся, прибежище наше и заступление.

Радуйся, дивный наш покровителю, святыи благоверный княже Довмонте.

#### **Кондак 4**

Бурю гонений от злых сородичей твоих претерпел еси, святыи княже Довмонте, и напасти от злых человек. От сих бед избави и нас, чад твоих, и твоими святыми молитвами всех нас беспечальных сотвори, да радующися

о тебе, яко о молитвеннике нашем неусыпном, воспоим Богу с тобою: Аллилуиа.

#### Икос 4

Добродетельное житие твое, храбрости исполненное, от отцев наших слышахом, святыи благоверный княже Довмонте, милости твоя, изливаемая на нас, грешных, видехом. Просим и молим тя: не остави нас в годину испытаний наших без защиты твоея, якоже древле отцев наших притекающих к тебе защищал еси, тако и нас сохрани. Да тебе, яко отцу нашему зовем тако:

Радуйся, бурю гонений и искушений претерпевый.

Радуйся, напасти от злых человек испытавый.

Радуйся, в новом отечестве твоем покой стяжавый.

Радуйся, добрым правлением мир в людех водворивый.

Радуйся, мужеством своим мир и покой граду Пскову даровавый.

Радуйся, славу Божию паче славы человеческия искавый,

Радуйся, величие Его пред очами всегда  
видевый.

Радуйся, вся добрыя дела своя, яко дары, к  
ногам Вседержителя приносивый.

Радуйся, дивный наш покровителю, святыи  
благодарный княже Довмонте.

### **Кондак 5**

Боготечною звездою восшел еси пред нами,  
святыи благодарный княже Довмонте, на  
высоте добродетелей своих дивно сияя и образ  
добрыи всем бывый. Тем же умы наша и очи к  
тебе, святче Божий, возводим и просим тя:  
подаждь нам, яко милость, дар добродетелей  
твоих, да поем вкупе с тобою Господу Богу  
песнь: Аллилуиа.

### **Икос 5**

Видеша людие града Пскова добродетель твою,  
по святом крещении возсиявшую, и слышаша  
от святого Писания о любви им речения,  
любвию святой к тебе объятии, вопияху тебе  
сицевая:

Радуйся, любвию объятый, страха смерти во  
уме своем не имевый.

Радуйся, сердца людские к милосердию возгревавший.

Радуйся, малочисленными ратями могучаго врага побеждавший.

Радуйся, крепким упованием яко стрелою враги уязвивый.

Радуйся, смиренною кротостию твоею гордыя враги со стыдом бежати заставивый.

Радуйся, долготерпением твоим вспять от себе врага отвращавый.

Радуйся, и по смерти любви своея к нам не оставляяй.

Радуйся, всегда нам милости своя изливаяй.

Радуйся, дивный наш покровителю, святой благоверный княже Довмонте.

### **Кондак 6**

Проповедника и делателя любви Христовой к людем видим мы тя, святой благоверный княже Довмонте, понеже крепка она бысть в тебе, яко смерть. Вода многих лишений ратных не угаси ю, и реки бед многих никогда же потопление устройша ея. Любовь твоя святая,

серафимским пламенем возженная, озаряет и нас, и воздвизает пети Господу песнь: Алилуиа.

### **Икос 6**

Воссиявши пред нами, яко знамя победное, любовь твоя к людям, благоверный княже Довмонте. Всегда влекла она и влечет к тебе нас, святче Божий. Всегда воздвизала и воздвизает нас от сна греховнаго, и припасти к раце святых и многоцелебных мощей твоих наставляет, и научает молити о спасении и зывати тебе тако:

Радуйся, добрыя дела, во имя любви к людям совершивый.

Радуйся, прелестями мира потопити любви своея не допустивый.

Радуйся, языческое омрачение, яко уметы отвергнувый.

Радуйся, воспоминаниями прелестей язычества никогда же себе омрачивый.

Радуйся, ненависть по святом крещении твоём своими ногами поправый.

Радуйся, возвращатися к ней себе не допускавый.

Радуйся, братоненавидение братолюбием победивый.

Радуйся, пиروвания воздержанием заменивый.

Радуйся, страдания людей твоих милосердием облегчивый.

Радуйся, немощи и пороки людские образом жития своего лечивый.

Радуйся, кротостию своею и смирением люди своя, яко агнцы сотворивый.

Радуйся, чистотою и бескорыстием их теми же соблюдый.

Радуйся, дивный наш покровителю, святыи благоверный княже Довмонте.

### **Кондак 7**

Хотяи спасти град твой Псков от нашествия врагов, ты, княже Довмонте, пришел еси в соборный храм Святыя Троицы, положи меч свой тамо пред алтарем Господним и паде ниц на землю, благословение Божие прося словесы сими: "Господи Боже сил, мы людие Твои и овцы пажити Твоея, Имя Твое призываем. Призри на кроткия, смиренныя возвыси, гордыя и высокия мыслию низложи, да не

опустеет пажить Твоя". И препоясався мечем от игумена Исидора, нападе на врагов и обрати их в бегство, поя Богу помогающему ти: Алилуиа.

## Икос 7

Дивнаго во бранех воеводу стране Псковской показа тя Господь, святыи благоверный княже Довмонте, ты бо еси своим мужеством многажды врага сильнаго и оружием крепкаго отражал еси, и искусством ратным от предел земли твоя бежати повелевал еси, страх сим вселяя в них. Людие же, водимии тобою, видя сие, взываху тебе:

Радуйся, великий благочестия столпе.

Радуйся, во исповедании веры православныа крепкий.

Радуйся, храбрый и сильный воеводо.

Радуйся, во бранех непобедимый.

Радуйся, в молитвах ко Господу неотступный.

Радуйся, прещением своим страхом врагов исполнивый.

Радуйся, благословением Божиим, аки мечем, препоясавыйся.

Радуйся, меч твой, яко видимую защиту твою нам оставивый.

Радуйся, дивный наш покровителю, святыи благоверный княже Довмонте.

### **Кондак 8**

Странником и пришельцем во страну Псковскую вшел еси, блаженне княже Довмонте, и тридесат и три леты во граде Пскове пожил еси, водворяя в нем мир и благочестие, искореняя лжу и неправду примером жития своего, и воздвизая всех за благодеяния Божия воспевати Ему: Алилуиа.

### **Икос 8**

Весь исполнен любви Божией к людям своим, до маститыя старости своея не оставяя еси народ Псковский милосердием. Твое последнее отражение врагов у храма первоверховных апостолов Петра и Павла о той же любви твоей гласит нам. Яко стар еси и труден годами, претрудное сие дело совершил еси и благословляемый благодарными людьми в малом времени от трудов своих праведных почил еси, званием почитаемый сими:

Радуйся, воспевателю Святыя Троицы  
изрядный.

Радуйся, молитвениче к ней неотступный.

Радуйся, почитателю Богородицы искренний.

Радуйся, призывателю святых угодников  
Божиих неусыпный.

Радуйся, зодче храмов Божиих усердный.

Радуйся, посетителю их неустанный.

Радуйся, со святыми Божиими собеседниче.

Радуйся, с иноками сомолитвенниче.

Радуйся, благочестивых людей в сердце своем  
благословлявый.

Радуйся, странных и убогих к себе  
принимавай.

Радуйся, лишенным крова покрове.

Радуйся, лишенным родства прибежище.

Радуйся, дивный наш покровителю, святой  
благодарный княже Довмонте.

## Кондак 9

Всяк возраст людей благочестивых входя во храм святыя Троицы и восходя по ступеням храма, числом равным летам жития твоего во граде Пскове, воспоминает добродетельное житие твое, како ты, восходя добродетельми твоими, Небеснаго Царствия достигл еси. И язычник сый в рождении, по святом крещении твоём греховное житие, яко прах отрясл еси, поя Богу: Аллилуиа.

## Икос 9

Витийствующий язык не возможет достойно воспети славное житие твое, великий угодниче Божий Довмонте, не может исчислити достойно и добродетели твоя и познати величия совершенств твоих. Обаче и малое сие и недостойное похваление приими от нас, княже святыи, зовущих тебе:

Радуйся, крилами Богомудрия небесных чертогов достигший.

Радуйся, очами Боговедения Бога пред собою всегда видевший.

Радуйся, руками добродетелей, спасение души своея строивший.

Радуйся, ногами трудолюбия, дар благих начинаний исполняти навыкший.

Радуйся, житие твое добродетельми исполненное скончавый.

Радуйся, пример любви к Богу и ближнему нам давый.

Радуйся, чудесами твоими в святости своей нас уверивый.

Радуйся, молитвами твоими нам защитника себе показавый.

Радуйся, дивный наш покровителю, святой благоверный княже Довмонте.

### **Кондак 10**

Спасти хотя душу свою, ты неленостно, святой княже, по ступеням добродетелей шел еси. Не знал еси покоя в делах ратных, терпел еси лишения с воины в годину сражений, отрицал еси страх при виде сильного врага пред собою, молитву совершая Богу о себе и людях, поя: Алилуиа.

### **Икос 10**

Стена и ограждение граду Пскову во дни жития был еси, святой Довмонте, и по смерти

своей не оставляя еси людей твоих  
беззащитными от нападений лютаго врага.  
Сего ради и мы, любовью чтуще тя, зовем ти:

Радуйся, чудотворче предивный.

Радуйся, молитвенниче преславный.

Радуйся, покрове Богом нам данный.

Радуйся, ограждением от врагов и по смерти  
нам оставленный.

Радуйся, яко тобою радость сыновняя нам  
бывает.

Радуйся, яко тобою любовь наша светло сияет.

Радуйся, яко тобою надежда наша не тщетна  
является.

Радуйся, яко тобою вера наша утверждается.

Радуйся, дивный наш покровителю, святой  
благодарный княже Довмонте.

### **Кондак 11**

Пение хвалебное и благодарственное  
неумолчно возносится и во дни сии о тебе,  
святой благодарный княже Довмонте,  
прославляя дивныя чудеса твоя, от мощей  
твоих исходящая. Слепому, по молитве его,

зрение возвратил еси, воздвизая и нас, слепоту греховную отрясше, с тобою воспевати Богу песнь: Аллилуиа.

## Икос 11

Светоприемным светильником содеялся еси пред людьми твоими, егда мощи твоя из земли во храм на поклонение изнесены быша. И молитвы людей в беде сущих не оставляя еси неуслышанными, всякому прибегающему к тебе милости изливая, да получивши просимое от тебе, благодарственно возносим тебе похвалы сицевые:

Радуйся, явлением своим мужу благоговейному, себе, яко молитвенника открыл еси.

Радуйся, повелением взяти покров от мощей твоих, яко чудотворца нового себе явил еси.

Радуйся, по обнесении по стенам града Пскова чудо победы над врагами показал еси.

Радуйся, яко сим чудом и по смерти твоей воеводою Отечества нашего быти не престал еси.

Радуйся, с воинами храбр воин и вождь бывый.

Радуйся, ратные дела с ними, яко равный, деливый.

Радуйся, яко молитва твоя со святыми слышана бысть.

Радуйся, сею молитвою Господь паки нам тя, яко чудотворца явил есть.

Радуйся, дивный наш покровителю, святой благоверный княже Довмонте.

### **Кондак 12**

Благодать Божия дана бысть тебе, святой благоверный княже Довмонте, во дни жития твоего, враги побеждающая и злыя сердца человеческия в мягкий воск претворяющая. Сия благодать является на людех твоих и по смерти твоей, недуги врачующая, оскудевающих в вере восполняющая, злобу и вражду среди верных церкви развевающая. Тем же не лиши и нас благодати сия, ты почитающих и поющих о тебе Богу: Алилуиа.

### **Икос 12**

Поюще твое дивное житие, любовию к ближним исполненное, дивный во святых Божиих, благоверный княже Довмонте, благодарим Господа давшего нам тебе,

таковаго угодника своего, и просим, и молим Его Всеблагаго, да не лишит Он нас за грехи наша твоего к Нему предстательства, но да получим по молитвам твоим у престола Вседержителя мир и покой душам нашим, и да отринем нерадение свое, песньми красными воспевающе тя:

Радуйся, княже, благодатию Божественною исполненный.

Радуйся, братскою любовью к людям воскриленный.

Радуйся, коснеющих в нерадении своем подвизающий ко спасению.

Радуйся, утопающих во гресех воздвизающий ко исправлению.

Радуйся, яко злом омраченныя люди к любви христианской ведеши.

Радуйся, яко неверующия ко спасению зовещи.

Радуйся, явлением своим, людей благочестивых в вере укрепляяй.

Радуйся, чудесы от тебе исходящими, Бога, дивнаго во святых своих прославляяй.

Радуйся, гонителей наказателю.

Радуйся, клеветников обличителю.

Радуйся, гонимых покровителю.

Радуйся, оклеветанных оправдателю.

Радуйся, дивный наш покровителю, святой благоверный княже Довмонте.

### Кондак 13

О, великий угодниче Христов, святой благоверный княже Довмонте! Приими сие малое и недостойное приносимое нами моление, избави нас, молитвами твоими от всякаго зла, и от всякой вещи сопротивной, ослабляющей веру нашу, да примем мир и покой в души наша и благодать Божию, оскудевающих восполняющую, и да поем о тебе Богу всегда: Алилуиа.

Этот кондак читается трижды и затем икос 1 и кондак 1.

